

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Home Minister Pu K. Sapdanga’n Larsapin Council of Minister thu la lovin Chakma Autonomous District Council Governor Rule-ah a dah a ti.
- 2. NITI Ayog-in hmarchhak biala SDG Index report (2023-24) thawhnhniha a tihchhuahah Hnahthial district pakhatna a ni.
- 3. Prime Minister Narendra Modia chuan Brazil a tlawh chuan rah tha tak a chhuah tih a sawi
- 4. US-a Texas State-a tuilian avangin mi 100 chuang an thi tawh.

<><><>

HOME MINISTER

Home Minister Pu K. Sapdanga’n tunhnaia Larsapin Chakma Autonomous District Council Governor Rule-a a dah chu Council of Minister ngaihdan a ni lo a, Democracy zahawmna tihmelhem thei ni hiala an hriat thu a sawi.

Vawiina Secretariat Conference Hall, MINECO, Aizawla chanchinbumite a kawmnaah he thu hi sawiin Home Minister chuan nimina Chakma Autonomous District Council Governor rule hnuaia dah chungchangah mipuite tana thil ngaihsual palh theih a awma hriat avangin, thil awmdan sawifiah sorkarin tul a tih thu a sawi a. Chakma Autonomous District Council-ah hian elected member 20 awmin an zinga member 16 chuan tun hnaiah ZPM party an zawm a. Heng MDC 16 hian ZPM Legislature party insiamin, CADC sorkar an siam thei a ni tih Governor hnenah sawiin thla hmasa ni 18 khan an inlan a, hemi chungchangah hian Chief Minister Pu Lalduhoma pawhin Larsap hnenah, member 16 nei ZPM Legislature Party chu CADC-ah sorkar siamtir mai tha a tih thu a lo thlen tawh bawk a ni a ti.

Hetihlai hian Larsap chuan Council of Ministers ngaihdan ziaka thlen tura a phut angin Council of Ministers chuan lungrual takin sorkarna siam thei an awm chuan Council thiah chu tha a tih loh thu leh, member 16 nei ZPM MDC-te chu CADC-ah sorkarna siamtir mai turin, tun thla ni 5 khan Larsap hnenah ziakin an thlen a, heti chung hian Council of Ministers ngaihdan ni lo zawngin Larsap chuan thutlukna a siam leh ta tho si a ti.

Home Minister chuan he thil thleng hi vanduaithlak an tih tak zet thu leh, Democracy zahawmna tihmelhem thei ni hiala an hriat thu a sawi a. Hei vang hian Larsap in CADC a thiahna chu sut leh ni se tih chu Council of Minister ngaihdan a nih thu a sawi a ni.

Byte of Home Minister....

Home Minister tawiaawmtu District Council & Minority Affairs Minister Pu C. Lalsawivunga pawhin chanchinbumite zawhna chhangin Autonomous District Council -ah Anti Defection Law a awmloh avangin nihna inchuh avangin sorkar a nghelngheh theih loh thu a sawi a. Hei hi Chief Minister pawhin a lo sawi tawh angin 125th Ammendment ah Anti Defection Law chu sorkarin an rawt ve thu a sawi a ni.

<><><>

MGNREGS

Mahatma Gandhi National Rural Employment Guarantee Scheme (MGNREGS) hnuaiah tun sorkar kum tharah hna 5,758 thawh tana ni tawh.

Vawiina Rural Development & Administration Minister hoa State Employment Guarantee Council (SEGC) thutkhawm he thu hi tarlan a ni a. Thutkhawm kaihruaitu Rural Development Minister Prof. Lalnilawma chuan mipuite’n an chhawr tangkai ngei tur hna uluk zawka thlanchhuah leh thawh kawngah State level leh District level-a Convergence Committee-te’n thawhhona tha an neih a pawimawh zia a sawi a. Tunhnaia tlawh hlawh em em ‘Ngai tlang’ lawnna step chu MGNREGS hnuaia “Project Rotling” 15 thlan chhuah zingah telin, hemi project atang hian step chu siam a nih thu a sawi a. Minister chuan MGNREGS thawktute hmalakna leh Social Audit Unit-in Financial Year 2024-25 chhunga Mizoram chhunga khua 874-a hnathawhte an endik kim vek thei chu fakawm a tih thu a sawi bawk a ni.

Kan corr report lo ngaithla ang.

VC

Vawiin MGNREGS chungchang thlirhona meetingah hian sorkar kum kalmek 2025-26 atan hna 5,758 thawh tan tawh niin, chung zinga hna 3,326 chu thawh zawh tawh a nih thu tarlan a nia a. Job Card 2,13,197 pek chhuah tawh zingah Job Card nung 2,12,676 awmin, heng zingah hian hna thawk thei 2,13,444 an awm tih tarlan a ni bawk. Tunah hian Mission Amrit Sarovar Phase II kalpui mek niin, hmun 131 ah dil thar siam leh a awm sa siam that nan hmalak mek a ni a. Social Audit Report atangin MGNREGS hna thawh kawnga harsatna hrang hrang tawhte chinfel an nih thu tarlan a ni bawk.

<><><>

SDG DISTRICT

NITI Ayog-in hmarchhak biala District Sustainable Development Goals (SDG) Index report (2023-24) thawhnhina a tihchhuahah Hnahthial district pakhatna a ni. District ti tha zual 10 zingah hian Mizoram atangin Champhai chu pahnihna niin Kolasib chu pakuana a ni bawk a. Mizoram, Sikkim leh Tripura te chuan hmahruaitu Front Runner Status an kai pha tawh a. Heng state pathumte hian Aspirant category awm district an nei tawh lo a ni. DSDG Index report ah hian Northeast Region-a district 121 dinhmun tarlan a ni.

<><><>

REVENUE

Saitualah Revenue Branch thar, Land Revenue & Settlement Department Minister Pu B. Lalchhanzovan a hawng a,

Minister chuan thusawiin, Revenue department chuan hna insemzai “decentralization” kalpui a tum ber tih sawiin, thingtlang atang pawha Aizawl pan kher ngai loin an awmna district-ah Revenue office an dawr thei dawn a, hei hian mipuiteah awlsamna a thlen dawn a ni, a ti.

Minister chuan Land Revenue & Settlement Department chu department dawr harsa tia sawi thin a ni chu pawl a tih thu a sawi a, hei hi thlak tumin “Customer care policy” te duanga theih tawp chhuah zel an tum a ni, a ti a. Land Revenue lama hotute chu an thawk rim hle a, chutih rualin ram lei leh hralh kawnga mipuite fimkhur tawk loh vangin buaina a tam thin a, hei vang hian mipuite pawh ram lei kawngah fimkhur se a ti.

Pu B. Lalchanzova chuan inrelbawlina felfai tak hnuaiah Revenue department chu a kal chho zel tih a sawi a, district tin thuam chak an tum thu sawiin, hma bak la ko viau mah se theih tawp an chhuah zel dawn a ni, a ti.

Saitual District-a Revenue Branch-ah hian Settlement Officer, Surveyor - I, II, III leh thawktu dang 7 an awm a ni.

<><><>

WEATHER

Indian Meteorological Department, Aizawl Director Pu Sudheer Kumar Dwivedi an Mizoramah khua a cheng zui dawn lo niin khawchin thlirlawknaah hmuh a ni a ti.

Akashvani zawhna chhangin Pu Sudheer Kumar Dwivedi chuan zanin hian ruah a sur zui rin ani tih sawiin Mizoram hmar lamah pheih chuan a tam zual dawn a ti a. District zingah Aizawl, Kolasib, Saitual, Champhai leh Mamit-ah ruah a tam theih thu sawiin a bak zawngah chuan ruah a sur an beisei tho nain a tam vak loh hmel a ti.

Pu Sudheer Kumar Dwivedi chuan Mipuite chhiatna thleng thei laka an him theih nan fimkhur turin a chah a, hetihruah hian ruah sur chu chhiatna liantham thlen lo tura an beisei thu a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan Brazil a tlawh chuan rah tha tak a chhuah tih a sawi. Social Media-ah he thu hi dahin Pu Modia chuan BRICS Summit ah thil pawimawh tam tak an ngaihtuah tih a sawi a. Brazil President leh sawrkar thawktute chungah lawmthu sawiin BRICS President chanvo tha taka an hlenchhuah thu a sawi a. Hei bakah hian ramdang hruaitute nen inkawmna hun tha tak an nei thei chu lawmawm atih thu a sawi baw k a ni.

BRICS Summit a hman zawh hian Prime Minister Modia hian nizan khan Rio atangin Brasilia khawpui a thleng a. India mi cheng tam takin an lo hmuak a ni. Pu Modia hian Brasilia ah hian Brazil President Luiz Inacio Lula da Silva a hmu a. Inremna thuthlung engemawzat ziah beisei anih thu Brazil-a India palai Dinesh Bhatia chuan a sawi.

<><><>

US FLOODING

US-a Texas State-a tuilian avangin mi 100 chuang an thi tawh.Tuilenna hmunah hian ni li chhung chhanchhuah hna thawh tawh anih avangin dama chhanchhuah beiseina a tlem tawh hle niin thuneitute chuan an sawi a. Mitthi zinga a tam zawk hi Kerr County ami niin an zingaah hian naupang 28 an tel a. Camp Mystic-a summer camp nei lai nia hriat a ni.

<><><>